

INUIT ATAQATIGIIT

INATSISARTUNI



UPA2024/35

11. April 2024

Kristian Jeremiassen

Uunga siunnersuut Aalisarneq pillugu Inatsisartut inatsisaat

(Aalisarnermut Piniarnermullu Naalakkersuisoq)

Aappassaaneerinninneq.

Inuit Ataqatigiit pilersinnejaramilli isumaqarput, nunatsinni pisuussutit tamarluinnarmik tunngaviusumik inuaat kalaallit pigigaat. Qularnaarneqassasorlu naleqartut inuaqatigiinni pilersinnejartut, inuaqatigiinnut tamanut iluaquataanissaat.

Anguniartuarparputtaaq Nunatta naalakkersuinikkut aningaasaqarnikkullu ineriartornera inuttut, inooqatigiissutsikkut avatangiisinullu tunngasutigut piujuarsinnaassuseqartumik ingerlannejassasoq.

Tassa tamakkiisumik isiginnilluni piujuartitsineq tunngavigineqassasoq - Aamma aalisarnermi pisuussutinillu atuinerni tamani avatangiisitigut, inooqatigiinnikkut, kultuurikkut aningaasarsiornikkullu piujarsinnaasumik tunngaveqartoqassasoq.

Naleqartitavut anguniakkavullu taakku, isumaqarpugut aalisarnermut inatsisissatut Naalakkersuisut siunnersuutaanni, maanna aappassaaneerlugu oqallisigilikkatsinni qitiusumik tunngavigineqartut.

Inuit Ataqatigiinni maluginiarparput inatsisissap siullermeeerernerata kingorna Royal Greenland-ip ukiumoortumik nalunaarutaata saqqummiunneqarlunilu sammineqarnera. Tamanna pissusissamisoopoq. Ingerlatseqatigiiffissuaq inuaqatigiinni pingaarutilik naalakkersuinikkut sukannersumik iliuuseqarfingeqartariaqartoq ersermat. Naammanginnngilarput ingerlatseqatigiiffiup inuaqatigiit aningaasaatai atorlugit nunani allani aningaasaliinersimanera tunngavingalugu annaasaqarsimammat, piumasarput tassavoq nunami maani ingerlatseqatigiffik aalisarnermut inuaqatigiinnillu iluaquatasumik sulissasoq. Mannalu iluatsillugu Naalakkersuisut kaammattorpakka sakkortuumik ersarissumillu ingerlatseqatigiiffiup tamatsinnut pingaaruteqartup nunatsinni aalisarnikkut siuarsaaqataanini suliarissagaa. Aningaasaqarnikkut ingerlatsinermini isertuaatsuunerunissamik ingerlatseqatigiiffik pigisarput pisussaaffeqarpoq, tamanna nalunaarsiornermini pitsaanerusumik suliassarissagaa naatsorsuutigaarput.

Ingerlatseqatigiiffik inuaqatigiit
malussartaatiginnerusariaqarpoq, nunarsuarmi

inissismanerannut
sorsuttoqarnerata

INUIT ATAQATIGIIT

INATSISARTUNI



aninggaasarsiornikkut eqquinerani, inuaqatigiit pigisatta ajunngitsorsissarsitsisarnera inuaqatigiit inissismannerannut malussartaateqannginnermik ersarsitsisoq tikkuarusuppara. Tamanna torralaanerliorneq uteqqinnejassangippat sukannersumik aqutsisoqartariaqarpoq. Sinneqartooreteqarani ajunngitsorsiassaqartitsineq ajunngitsorsiaqarnermik taaneqarsinnaanngilaq, suliamilli tamakkiisumik naammassinninnginneq ajunngitsorsiaqarfiunera inuaqatigiinnut piginnittuusunut naapertuilluarnerunngilaq.

Aalisarneq qularutissaanngitsumik ukiorpassuarni inuussutissarsiutitta pingaarnersaraat sulilu ukiorpassuarni taamatut inissimasussaalluni.

Ukiorpassuarni aalisarnermut inatsisiornissaq politikkikkut oqallisigaarput, ukiunilu taamak amerlatigisuni oqallinnerput ilaatigut nalorninermik inuussutissarsiuteqartunut sunniuteqarsimalluni. Siunissarmi qanoq toqqammaveqartumik inerisaavigissanerlugu aaliangertoqartinnagu ilisimaqqissaarneqanngimmatt.

Taamaammat maanna Aalisanermut inatsisisaqq ukiorpassuarni oqallisaareerluni, qineeqquaarutaareerluni suliarineqareerlunilu kiisami Inatsisartuni oqallisigisarput inaarutaasumillu aaliangiiffingiartuaangarput, Inuit Ataqatigiit aappassaaneerinninnermi imatut oqaaseqarfingissavarput.

Inuit Ataqatigiit siullermeerinninnermi oqaaseqaateqarnitsinni arlariinnik isummersuuteqarpugut kissaateqarlatalu. Taakku ataatsimiitsitaliami sulinermi ilaatigut suliarisimavagut ilaallu maanna aappassaaneerinninnermi pinngitsoorusugata oqaaseqarfingissallugit.

Iluarismaarpaarput ukiorpassuarni naqissuserneqartariaqartoq, inatsisissatut siunnersummi kiisami Naalakkersuisut naqissusermassuk, tassalu pisuussutit - aalisagaativut inuaat kalaallit pigigaat. Kalaallillu tamakkiisumik pisassat pigissagaat, tassa 100%-imik nunatsinneersut piginnittuunissaat naqissuserneqalerluni. Inuit Ataqatigiit taamanna anguniartuarsimagatsigu taperserlugu naqissuseqqissavarput.

Ilanngullugulu avataaniit piginnittuusinnaanerup immikkut ittumik akuersissutigineqarsinnaaneranut siunnersummi periarfissaqartitsinerup, amerlanerussuteqarluta peerneqarnissaanik kaammattuuteqarnerput pisussanngormat iluarismaarpaarput, taamaalillunimi piginnittussaanerup nunatsinneersuunissaanik naqissuseeqinnerussammat.

Ukiorpassuarni inuaqatigiinni naalakkersuinikkullu oqallisaavoq aalisakkanik pisassaatillit eqiterukkaluttuunnarnerat killilerniarneqartariaqartoq.

INUIT ATAQATIGIIT

INATSISARTUNI



Inuit Ataqatigiit pisassat pigineqarsinnaasut qummut killingata appartinneratigut kiisalu pisassaatinut naatsorsorneqanngitsunik toqqaannanngitsumik piginnittuusinnaanerup periarfissaajunnaartinneqarnissaa - Naatsumik oqaatigalugu eqiterussiunnaarluni siammasinnersumik piginnittusoqarsinnaalernissaa - attatiinnarneqartoq taperserparput.

Pisassanik killeqanngitsumik oqaannaranni naassaanngitsumillusoq piginnittuusinnaanerup inatsisisstatut siunnersuummi aaqqiivigineqalerlnera pitsasutut isigaarput. Taamaalillunilu pisassat qaqaguugaluarnersoq aaqqissusseqqiffingeqassappata, pisassanik uterartitsisinnaanermut inatsisitigut tunngavissamik nalorninanngitsumik pilersitsisoqalerluni. Ataatsimiitsitaliami sulinitssinnitaaq paasinarsivoq ullumikkut inatsimmi atuuttumi allangornialikkatsinnilu, apeqqummi tassani ersarissumik sinaakkusiisoqarsimannginnerata nalorninartumik inissisimatitsisoq. Paasinneriaatsit assigiinngitsut pigineqarmata. Nalorninanngitsumik taamaammat aaqqiinissamut allorialerneq tamanut pitsasutut isigaarput.

Ukiorpassuarni umiatsiaararsorluni pingaartumik qaleralinniarnermi oqallisaasoq, tassalu paggatassiilluni pisassiisarneq aammalu umiatsiaararsortunut pineqartunut piumasunullu PNNP-mik eqquassinissaq inatsisisstatut siunnersuummi ammaanniarneqalersoq taperserlugu naqissuseqqissavarput. Iluarismaarlugulu aalisartut nammineq toqqaanermikkut ullumikkutut imaluunniit PNNP atorlugu ikaarsaarsinnaanissaat periarfissinniarneqarmat.

Isertuaatsumik ingerlatsinerup aqutsinerullu anguniarneqarnera Inuit Ataqatigiit tamakkiisumik tapersersorparput. Inuiaqatigiimmi pisuussutit pigisamik atorneqarnerannut malinnaasinnaanissaat inissaminiimmat.

Inatsisisstatut siunnersuummi inuiaqatigiit kalallit ingerlatseqatigiiffiutaata Royal Greenlandip immikkut pineqarniarnera annertuumik oqallisaavoq.

Inuit Ataqatigiit Royal Greenlandip immikkut pineqarniarnera pillugu isummat assigiinngitsut tamakkiisumik isiginnittaaseqarluni naapiffeqartariaqarnerat avaqqunneqarsinnaanngitsoq oqariartutigaarput.

Maannalu inatsisisap aappassaaneernerani ataatsimiitsitaliami isumaliutissiissutitsinni, qupp.6-mi, Royal Greenland pillugu ersarissuliortoqarpoq imaattumik:

"Siunnersuummik suliarinnereernermini ataatsimiititaliaq isumaqarpoq ingerlatsisut unammilleqatigiinnikkut assigiimmik atugassaqartinneqarnissaat

INUIT ATAQATIGIIT

INATSISARTUNI



pingaaruteqartoq. Taamaattumillu pisassiissutit amerlassusaasa killissaat eqqarsaatigalugit siunissami ikaarsaariarfegartumik ingerlatseqatigiiffiit pisortanit pigneqartut namminersortullu naligiissinnejarnissaat ataatsimiitaliamit piumasarineqarpoq”.

Taamak ataatsimiitsitaliap siunnerfiliinera equngasumik inoqarfippassuit eqqornerlunneqanginnissaannut qulakkeerinnejataassasoq isumaqarpugut. Tassami ataatsimiitsitaliami sulinitssinni, ikaarsaariartsipiloortoqassappat inoqarfippassuarnut kingunerlussinnaasoq paasinarsimmat. Illuatungaanilu aamma assiginngisitsisoqannginnissaaoqallinnermi maannamut ataatsimiitsitaliamilu sulinermi aamma uteqqianeqarsimasoq ornikkiartuaarneqarumaarluni.

Inatsisissatut siunnersuutip saqqummernerani illi maluginiarparputtaaq nunami suliffissuarnik matusoqarnissaanik aarlerissuteqartoqarnera.

Ataatsimiitsitaliami amerlanerussuteqartugut tunitsivinnik tunisassiorfinnillu matusisoqannginnissaaoq kissaateqarnerput, soorlu Aasianni tunisassiorfiup ingerlaannarnissaanik kissaateqarnerput attapparput.

Iluarisimaarpapullu Naalakkersuisut aappassaanerinninnermut akissuteqaamminni, tunitsivinnik matusisoqannginnissaanik aalisartullu ikileriannginnissaanik oqariartuuteqarmata.

Tulaassisussaatitaanerup sulisartut kattuffiata SIK-p qaffasinnerulaarnissaanik, sulisartut suliffissaqartuarnissaanut oqariartuuta amerlanerussuteqartugut aamma naaperiarsimavarput. Suliffissuillu ingerlaannarnissaanut ilapittuutaassasoq upperaarpot, kommunenummi minnerunngitsumillu innuttaasunut tunitsiviit suliffissuillu imminut napatinnissamut aningaasarsiornikkullu isumaqaqaat.

Inuit Ataqatigiit aalisarnermut inatsisissap maanna iluseriligassaa tunngaviatigut taperserparput. Inunnillu eqqornerluiisanngittooq kissaatingalungu naqissuseqqissallugu, imatut paasillugu: sulisartut angerlatinneqarneranik aalisartunillu ikilisaanermik kinguneqartariaqanngittooq.

Aalisarneq aningaasarsiqluarfiussaaq aalisartumut iluaqutaasumik aalisarnermut inatsit aqqutigalugu aalisartunik pilliuteqarata ataatsimulli kivitseqatingiinnitsigut aalisartunut amerlanerpaanut iluaqutaanissa maanna alloriarfissanngorpoq. Aammaarlatalu oqaatigeqqissavarput iluarisimaratsigu, Naalakkersuisut inatsisissatut siunnersuummi suliaqarnerminni aalisartukillisaaneq siunertaanngitsoq aamma tunisassiorfinnik matoraasoqarnianganngitsoq naqissusermassuk.

INUIT ATAQATIGIIT

INATSISARTUNI



Inatsisisap aalisartunut ataasiakkaanut aningaasatigut kingunerisinnaasai pillugit aaqqiiniarnermi naalakkersuisut suleqataanissaat pisariaqartoq isumaqarpugut. Ataatsimiititaliap sassarttsinermini aammalu tusarniaanerni erserpoq aalisartut ingerlaannarnissaanut anigaasaliisinnnaaneq aningaasanillu attartornissamut qularnaveeqqusiisinnaanermut sulinissaq pisariaqartoq. Suliaq tamanna Naalakkersuisut peqatigalugit suliarineqassasoq Inuit Ataqatigiinniit isumaqatigivarput. Siullermeerinninnermiit oqaatigisarput oqaatigeqqillugu, qulakkeerusupparput inatsit aalisartumut ataasiakkaanut eqquinerlunnginnissanngitsoq.

Naggasiaartaarnitsinni makku aamma apuukkumavagut.

Aalisarnermut inatsisiilornerput iluatsillugu ersarissumik naqissuseqqikkumavarput niuernikkut, ilinniartitaanikkut aningaasarsiornikkullu ullumerniit suli annertunerusumik iluaqutigisassatsinnik siuarsataasussanillu aalisarnerup silarsuaani alloriartariaqartugut. Aquummi tamakkiisumik tigusariaqalerparput, allanik isumalluuteqaannarata.

Akunnermiliuttulorsorluni niuerneq qimallugu nunatsinnit aallaavilimmik niuerneq ingerlasariaqalerpoq. Tassanilu ilaatigut ilinniartitaanikkut aalisarnerup iluani aningaasarsiornunilu niuerutigineqarneranut ilisimasavut aamma qaffassartariaqarpavut. Nunat allat niuernitsinni akunnermiliuttoriunnaarlugit.

Kaammattutigiumavarputtaaq uumassusilinnik misissuineq annertusartuarneqassasoq malitsigalugulu Pinngortitalerivimmuit aningaasaliissutit qaffassinnaanerat isumaliutaassasoq, ilisimatuussutsikkut ilisimasagut annertusarniarlugit taamaaliornikkut aalisagartassiissutit qaffassinnaaniassammata. Aalisakkap tamarmi atorluarneqarnissaattaaq anguniagaraarput, aalisarnermullu inatsit ilaatigut aqqtigalugu naleqarnerulersitsinissaq nunatsinni angusariaqarparput.

Isumaqarpuguttaaq aningaasarsiornikkut inuussutissarsiornikkullu aalisarnermi siuariartorneq inerisaanerlu ingerlanneqassasoq, avatangiisit mianeralugit aammalu aalisarnermi ilinniartitaanerup qaffassaaffingineqarneranik kiisalu najukkami suliffissanik pilersitsisoqassalluni naleqarnerulersitsineq aqqtigalugu nunatsinni.

Inuusuttut ullumikkut aalisarnermik inuussutissarsiuteqalersinnaanerat pitsaanersusariaqartoq isumaqarpugut. Isumaqarpuguttaaq arnat amerlanerusut aalisarnerup iluani inuussutissarsiuteqarsiuteqarsinnaasariaqartut. Siunissamimi ungasippallaanngitsumi, inuiaqatigiinni ukioqatigiaat agguarnerat

INUIT ATAQATIGIIT

INATSISARTUNI



aallaavigalugu, ukioqqortusiartortut inuusuttunit amerlanerunissaat tunngavigalgu aalisartussaaleqilersinnaanerput siulittuutaasalermat. Naalakkersuisut kaammattorpavut tamanna aamma eqqumaffigissagaat.

Ukiut tamaasattaaq aalisartut akuersisummik qinnuteqartariaqartarnerat eqqarsaatigineqaqqittariaqartoq aammaarluta Naalakkersuisunut kaammatuutigaarput.

Qularnanngilaq aalisarnermut inatsisissaq kikkut tamarmik assigiimmillu iluarisaanik naammassineqarsinnaanngimmat. Pingaaruteqarporli suliarylugu kiisami naammassinissaa. Iliuuseqarata oqallittuartilluta, nunatta inussuutissarsiutaa pingarneq nalorninartumiitsituassavarput.

Utaqqineq nalorninermik nassataqartarsimassasoq ilimanarluinnarpoq. Inatsisitigummi sinaakkutissat suunersut nalullugit siunissamut takorluugaqarluni pilersaarusiorsinnaaneq aningaasaliisinnaanerlu pisinnaanngimmat. Tassa, nalornineq utaqqimaarnerlu qaangiuttariaqalerput. Siunissaq periarfissiisoq ikaarsaariarfiusariaqalermat.

Inuit Ataqatigiit oqallisigiinnarnagu timitaleeqataanissamut peqataassaagut allannguinissamullu tunuliaqutsiissalluta.

Naleqartitavummi aallarniinitsinni oqaaseqaammilu ersarissakkavut, inatsisissap maanna iluseriligassaanut naapertuuttutut isigaavut.

Taamak oqaaseqarluta aalisarnermut inatsisissatut siunnersuutip allannguutissaasa saqqummiuneqareernerisa kingorna iluseriligassaa taperserlugu, Aalisarnermut, Piniarnermut Nunalerinermullu Ataatsimiitsitaliamut inaarutasumillu pingajussaaniinnginnerani innersuupparput.

Qujanaq.